

# INUIT ATAQATIGIIT

## INATSISARTUNI



Nuuk 14. Januar 2011

Inatsisartut Suleriaasianni §37 naapertorlugu naalakkersuisunut apeqquteqqat:

**Naalakkersuisut Kalaallit Nunaata imartaani umiarsuarni ikummatissanik oqimaatsunik atuinnermut malittarisassiulersaarpa?**

**Naalakkersuisut gassinik silaannaap kissatsikkiartorneranut patsisaasunut aningaasartuutaasussanut misissuinerat sumut killippa?**

(Inatsisartuni ilaasortaq, Naaja Nathanielsen, Inuit Ataqatigiit)

### Tunggavilersuutit

Ataatsimititaliamiit Polaroil A/S-imut pulaarnermi ilisimatinneqarpugut Kalaallit Nunaata imartaani umiarsuit uuliamik oqimaatsumik atuinnerulersimasut. Uuliamik oqimaatsumik atuinnermi CO<sub>2</sub>-mik aniatitsineq anginerusarpoq, ikummatissanut allanut sanilliullugu.

Ikummatissat oqimaatsut maqisoqartillugu immami arrortikkuminaannerupput, arrortikkuminaannerallu sakkortusineqartarluni immami nillertumi maqisoortoqarsimappat. Taamaammat uulia oqimaatsoq allanut sanilliullugu mingutsitsinerusutut isigineqarpoq.

Ullumi inatsisit aqputigalugit avatangiisinut asattuussinerunissaq siunertaralugu ikummatissanut uuliamik tunggavilinnut malittarisassiortoqarsinnaavoq, tamannali taamaallaat nunami uninngasuuteqarnermut ingerlatsinernullu atatinneqarpoq. Kisiannili ikummatissat uuliamit tunggaveqartut imaani uninngasuutigineqarpata ingerlatsissutigineqarlutilluunniit taava inatsisitigut iliuuseqartoqarsinnaangilaq. Kalaallit nunaatali imartaani avatangiisinut asattuussinissaq siunertaralugu sukannernerusunik inatsisitigut malittarisassiorneq periarfissaavoq, taamaalillunilu umiarsuarni ikummatissanik oqimaatsunik atuineq iliuuseqarfigineqarsinnaalluni.

Naalakkersuisut saqqummersitaanni "2008-miit 2012-mut gassinik silaannarmik kissatsitsisartunik aniatitsineq annikillisinnaarlugu sunniiniutissat pillugit nassuiaat" allaqqavoq aalisarnermi imaanilu assartuussinermi umiarsuit (soorlu assartuutit, misissuinermi umiarsuit takornariartunillu angallassisunik umiarsuit) uuliamik atuisooqisut. 2009-mi ukiakkut ataatsimiinnermi Ineqarnermut, Attaveqaaqatigiinnermut Angallannermullu naalakkersuisup Jens B. Frederiksenip ilisimatitsissutigaa inuussutissarsiutini saqqummersitami sammineqartuni, naalakkersuisut CO<sub>2</sub>-mik aniatitsinermut tunggatillugu aningaasartuutaajunnartussanik nalunaarusissasut. Malitsigisaanillu inatsisartuni ataatsimiititaliat suliarnut attuumassuteqartut peqatigalugit, sukumiisumik eqqartuisoqassasoq periarfissat kingunerisassallu saqqummiussami inaarutaasut atuutsitsilernissaanut aqputissiuinarluni.<sup>1</sup>

Kalaallit Nunaata nunat tamalaat akornanni isumaqatigiissutaasut soorlu Kyotomi isumaqatigiissut kiisalu Københavnimi nalunaarut naapertorlugit anguniagaqassaguni, taava CO<sub>2</sub>-mik aniatinneqartoq millisarneqassaaq. Pingaaruteqarpoq anguniakkatut aalajangersakkat anguniarneranni tamat peqataanissaat. CO<sub>2</sub>-mik millisaaniarnerup anguniarnerani aningaasartuutit ikigisassaangitsut tamatigut atorveqartarput, tassami atorveqartut nutaaliaasunut aningaasaaliineq pisariaqartinneqartarmat. Taamaattumik pissusissamisoorpoq paasissallugu inuussutissarsiutit sorliit anguniagaasumut naammassinninnissaminnut qanoq aningaasartuuteqassanersut paasissallugu. Akileraartarnermut akitsuusiisarnermullu aqqissueqqinnissaq tikittussaavarput, tamassumalu periarfissippaatigut avatangiisinut asattuussinerunissamik tunggaveqartumik ineriartortitsinissamut. Tamanna pisinnaavoq avatangiisinut asattuussinermut siuarsaataasunik akitsuusiinikkut, tapiissuteqarnikkut akitsuutinilluunniit ilanngartuinikkut.

<sup>1</sup> Naalakkersuisut saqqummiussaak punkt 127 / UKA 2009 naapertorlugu